

آخر نو فمبر

محمد رضا

آخر نو فمبر

محمّد رضا

The Writer Operation

شارك سطورك مع العالم

(مقدمة)

إهداء إلى (أمي) التي عانت الكثير من أجلنا، أتمنى
من الله أن يمدها بالصحة والعافية.

هذا الديوان ..
مليان لخبطة مشاعر
كتبه بني آدم في الأصل شاعر
في سن صغير على مشارف العشرين
لكن نزل للدنيا بدري، ومعجون بخبرة راجل في الستين
هتقرأ سطور من نور، وبتشاور
على كل اللي نفسك فيه وعايز تقوله
لكن بتعافر ولسه بتحاول
ولسه فينا حيل نعانده
لسه فينا حيل مهما قلت الفرص
لسه فينا حيل نعيش و نغلب و نصلح من أخطأنا
لسه فينا حيل نحله و نصدق .

قصيدة (كبر أولاد)

جوه أوضتي و مقفول عليا بابي

وكالعادة في الركن البعيد الهادي

قعدت و معايا قهوتي و قررت أكتب مُذكراتي

فكرت أبدأ منين، ملقتش شيء مثير في حياتي

قولت هبدأ من الأول خالص واجيب أصل الحكاية

حكاية ولد صغير، يلعب وبياكل وينام

وعقله مليان بالأحلام

و مكنش يشغل باله أي كلام ، ولا مشاكل ولا خناقات ، ولا
مظاهره ولا هتافات

كان الأب شادد حيله و القرش على طول موجود، و الأم في
ضهر راجلها واقفه عمود

و البساطة و الحب يملوا البيت و العيال يتربوا على الأصول

وشويه شويه كبر الواد وبقى يطلعوا شنب و بدأ يعرف إن
الدنيا مش مكسب بس و إنه ممكن يتغلب

و ساعتها راح الأب، و أمر ربنا نفذ

وبدأ الواد ينزل للدنيا و يحاول يسند البيت اللي مال

و قرر يشيل و بصراحة شال

شال الهم و الفرح و الحزن

شال شبابه على كفه و لبس قناع راجل في الأربعين

و اتعامل مع ناس ، متعرفش ملة ولا دين

و الواد نشف و إتعلم ، و كل يوم يعدي عليه ، كان يسيب
علامة في قلبة بتعلم

و فجأة حس إنه شبابه راح في الرجلين، حس إن الدنيا سرقتة

رغم، إنه مُسالَم و عمره ما أذى حد

عُمر ما شاف منها هزار أو ضحك على طول قالبة وشها جد

بس فضل يدعي ربنا وكان عارف إن ربنا هيعوض تعبته خير

ولو مخدش عوضه في الدنيا، هياخد عوضه في الجنة الطاق
طاقين.

قصيدة (مدون الشباك)

الساعة ٦ الصبح سنة ٢٠١٠م، أمي بتصحيني للمدرسة وأنا
كالعادة مغلبها

قومت وبفتح الشباك، لجل ما شمس ربنا تملى الأوضة

وساعتها شوفتك وشمسك ملت قلبي ده لو مكنتش ملت
دنيتي كلها

ونظرة عنيني، زي موج البحر وأنا عمري ما روحت اتمرنت
سباحة

وبقيت بستني أُمي تصحيني في نفس الساعة، لجل ما أشوفك
فا أحس برااحة

خُصل شعرك كانت سودة حير، من نوع نادر وأنا مش ببالح،
صحيح أنا مش في شعر البنات خبير، بس في كتابة الشعر
شاطر

وبقيت بتحجج لصحابي إني بلبس الجزمة وعشان كده بتأخر

وميعرفوش إني بقيت عاشق وبكذب عشان أرضي غريزتي
وقلبي العطشان

وبفضل قدام بيتنا، مستني خروجك من بيتكوا، واسرق منك
نظرة، مفعولها أشد وأقوي من مفعول الخمرة على السكران

و بروح مدرستي وأبدأ أكتب موضوع الدرس، وأشد خط و

اتلغبط فا أشغبط ، و أبدأ أكتب تاني

وفجأة ألاقى نفسي بكتبك شعر وكأنها حاجة لا ارادية، أمر
واتفرض عليا

وسطر يجيب في سطر والسنين عدت، وبتكبري قدامي
وشايف فيكي بنتي البكر وشايف فيكي أحلامي

واللي يوجع في الموضوع إن بنتي وأحلامي بعيد عني، وأنا واقف
بتفرج

وعمال أقدم رجل وآخر رجل وأخيرًا خدت قرار، بس مكنتش
عارف إن النهاية بتقرب!!

وروح وقلتلها أنا بحبك ويشهد على عشقي ليكي شباك بيتنا
وحارتنا والتخته بتاعتي جوه الفصل وكذبي على صحابي

ردت وقالتلي أنا مقدره مشاعرك وإنك طيب وجدع من أجدع
الجدعان

في لحظه فرحت وقلبي انشرح

وكملت كلامها ب أن حبيبها مستنيها ، و خايفة تتأخر

وفي نفس اللحظة، قلبي من الصدمة انشق واتجرح

كانت متزوثاله وشعرها الناعم طاير في الهوا

وقبلها بثواني كنت بتخيلنا إحنا الإثنين سواء،

دلوقتي بقيتي معاه وأنا بقيت لوحدي

وكأن قلبي يهودي وإنّي قلبك هتلر، حرقتي كل المشاعر الي
بنيتها وحوشتها

ومش عارف في البعد عن حبك هقدر وهقبل بفكرة إن كل
شيء انتهى

عارف إني السبب وعارف إني اتأخرت، وبنتي البكر راحت مني

ومفتكرش إني هقدر أحب تاني

ولا خلاص كبر سني.

قصيدة (مراهقة طفل في العشرين)

عمرك دورت على الحب؟
ولا الحب هو اللي بيدور عليك
تفهمها ازاى دي بتاعتي!!
أظبط ساعتك وأنا هظبط ساعتى
قدامى ٥ دقائق هحكىلك فيهم
عن أيام فاتت وليالي كنت بخاف أحكيهم

عن مراهقة طفل في ال ٢٠ من عمره
هحكي تجاربه ومش هبرر
ولا هقول ده كان مغلوب على أمره

في سن ال ١٧ قابل بنوته وكانت بنوته جميلة
قدر وبلهفة يشغل بالها وفي ليلة كان راسم عليها الدور

أنا بحبك، بموت فيكي
ربي يجعل حي ماء ليرويكي

وفترة بتجيب فترة وأيام وبتعدي
ومطولش الموضوع لسنة وظهرت التيته
وقرر يقطع الصفحة وجرحها بينزف
وبالنسباله سهلة وجت بسيطة
ومشغلش باله بالوردة اللي اتقطفت
وورقها جف ونشف

وكانت ضحية طفل
في مراهقته وبيقول يا هادي

كانت مجرد حاجة بتسليه في وقت فاضي
وبسرعة البرق عدى الوقت وبقت ماضي

وقرر يعكس الدفة والهوا رماه على وردة جديدة
مكنتش في الحسبان ولا من قريب ولا من بعيد
بس دي بالذات حس من نحيثها شعور أكيد
كانت كالجوهرة بتلمع وبتشده
وكانت بالنسبالة مصدر قوه مش شيء يهده

ومكنتش متردد وكان واخذ قرار
وبتهور وبسبب سواقته
غرقت السفينة وصاحبنا، كان شهيد البحر
مخدش رصاصة الرحمة
وكأنه انتقام والقدر لعب دوره

نفس اللعبة تتكرر وصاحبنا المرادي كان لعبة
واتردله القلم قلمين، وبنفس الطريقة
رجع لبيته ولأوضته وييندب حظه وخسارته

وقرر ياخذ هدنه وقال أنا صغير

ولسه بدري عليا

ومعترف إنه غلط و اتردله الغلط بقسيه

وفي وقت هدنه جتله حورية من البحر

وكأنها كانت في ديله وهو غرقان

مكنش عارف جاتله ليه وعلشان؟؟

وخدله وقت يفكر وحس هنا إن الحب هو اللي جاله

هو اللي ندهله وجاب حورية وسبهاه

وفرح صاحبنا

وحرية بقت أساس
وقال هيبي عليها كثير
وقال هعوض خسارتي
وهطلع كسبان من حربي
وعمري ما هرجع لدور الأسير

وسنة جابت سنة وكان عايش
ومبسوط، وقال خلاص بتضحكلي
وبكبر والاستقرار بيندهلي
وجت بكلمتين وقت الوجع
بسكينة تلمه تقتلني
معرفش إيه السبب
مكنش ليه لازمه وفي نظرك
كان كلام واتكتب
بس مش كثير مننا بيسامح وقت الغضب

والكبرياء كان ليه دور كبير
ورجع صاحبنا لأوضته
وبيكتب ديوانه الأول
ومش هيحطله نهاية
وعارف إن لسه في حكايات ياما
ومش هتقف على حكاية

عدوا ال ٥ دقائق هوا وأنا لسه بحكيك
عن مراهقة طفل من جيلك
ويمكن مش نفس الجيل
بس اللي متأكد منه
إن دايمًا حكايات الحب
بتخلص على دمة ومنديل.

قصيدة (نيل)

مرت الأيام

ولسه الليل بيبيجي هو هو بكل معانيه
ومش هيفهم قصدي غير كل اللي مر بيه
بنخش حروب في الليل مع أفكارنا
بنشوف ونراجع أخطائنا
سلمنا قلوبنا لناس
و للأسف كنا إحنا اللي اختارنا

رغم كل ده

لسه القمر ثابت مكانه

ولسه صوت الست سابق زمانه

ومرافق لكل عصر

وفي الليل سكون الشوارع

والجو هادي وصوت الراديو

بيخروش على السامعين

وكأنه بيقول، ما تناموا إنتو ليه قاعدين

وميعرفش إننا بنهرب من الدنيا وندارى في الليل

في الليل، كل النفوس طاهرة

وبتغسل قلوبها بصدق

ومظنش بعد جلد الذات

في ناس بتغسل قلوبها بكذب

وهي دي الفقرة

هي دي الي قبل نوم بتسهر

هي الي بسببها بتصحى متأخر

وبتسمع كلمتين بايخين من مدير

باع طاقتة ونفسه لشغلانة

وماتت جواه مشاعر ياما

وفقرته خلصت وعایش مجرد أله

وتحاول تعدي اليوم

وتخرج صافي بدون خسائر وأي هموم

ويجي الليل وترجعله وتاخده بالأحضان

وتبدأ فقرتك تاني وتغسل قلبك

من مشاعر ماتت

وتجهز نفسك لاستقبال مشاعر تانية

أكيد اللغز في الليل
بخرج من كل حرب واروحله قتيل
وألاقي علاجي وياه

وهفضل أحكي للقمر على كل اللي واجعني
وصوت الست محاوطني في كل مكان
ولسه جرحي صاحي
و أنا لسه بنزف لحد الأن .

قصيدة (خيال مائة)

خيال مائة..

والعمر طال بيا

وكل يوم بستنى موتي، وكل لحظة بتعدي

كنت بقول هي دي لحظة سقوطي

هي دي اللحظة الأخيرة

وبقول في بالي، خلاص هفارق

هفارق الشوارع والبيوت والقهاوي والفسح

والسهر مع كلمة حلوة من لسان بنت القمر

والكلام لو زاد حبه، زاد معاه ود ومحبة

وما ينقصش من جمال لمتنا وقت الفرح وقت السعادة،
وأخاف لو قصرت يوم في طاعته والعبادة

هفارق واقفة النواصي والكلام عن حلم بكره
مع شوية عيال حافية، والمرمطة في ساعة كورة

ملعونة أبو الدنيا الغرورة
سحبت الأيام توالي ومخلتليش عزيز وغالي
شبح الوحدة مطاردني ، والجنون بقى حيطة محاطني
عدت الأيام خوالي، مكسبتش منها ذكره
فاتت مدرسة في جامعة في وظيفة قهرتني
قتلت الموهبة والشغف ادفن
مع حلم كان ممكن في يوم يتحكي
شاب جميل ووسيم وذكي
يملك حس الفكاهة، كان كوميدان

موهوب بيخلي الناس تضحك

خدها في وشه من الدنيا وقالته أصارحك
إنت مهرج ويكاد تكون أراجوز
وهفضل أعانذك وأديك بوظين مش بوظ
ومش هتوصل لحاجة والحلم هيتقلب لكابوس
والنكتة بايخة وكفاية نكتك يا عجوز

وسمعت منها كلام

ولقيت سناني بتخلع وشعري بقى واقع
وصيفي بقى ساقع وقلبي بقى ضعفان

وشكلها ساعتي

وجسمي بقى سايب، وعضمي سال دايب
واستسلمت مع ضحكة

وبودعکوا
مع تحیات اراجوز شایب.

قصيدة (شيزو فرينيا)

انزلوا!!

، انزلوا واملوا الشوارع واخرجوا

وسيبوني أنا لوحدي!!

وياريت كمان تسيبوني في حالي

أنا في طريقي لرحلة البحث عن راحتي

و ده مش أول طريق همشييه، أنا طول الوقت عابر في طرق

الدُّنيا اللي سككها مش سالكه

كداب اللي قال إن الطريق أسفلت متساوي

و أنا دايمًا تلاقيني واخد جمب ، فوق الرصيف ماشي

وفي لحظة حسيت إن رصيد الصبر عندي نفذ

و قائمة الأسماء في دليلي في منها كثير اتحذف

عشان مقبلتش إن حد يقررلي مصيري

أنا الأمر الناهي في كل قرارت حياتي

و أنا اللي شيلت همومكوا ياما، وأنا برضه اللي من الوجد بكيت

وفضل صوت أهاتي يعلَى و يعلَى و كنت فاكِر إني خلاص
انتهيت

ياريت كل اللي فات يرجع، وأصلح غلط حاصل، قالولي مع
الوقت هتكون أحسن، فا حبيت أجمع بين الوجد والظلم،
لقيت نفسي الناتج الحاصل

بس لو هلة حسيت إنها تنفع نهاية لفيلم،

البطل فيه كان عايش سعيد وراضي وفي الآخر اكتشف إن كل
ده كان حلم

اعتبروها، شيزوفرينيا!!

اعتبروني طالع بكام شخصية

واعتبروني ممثل شاطر واعتبروا الفيلم نجح بنسبة

٪ ١٠٠

بس أمانه عليكوا بلاش يكون لي حبيبة جوه الفيلم

أنا نفسي في دور جديد، خلاص ملييت من دور الضحية

مش كل مره هقطف وردة، واقتلها بسعادتي، عشان أديها
لواحد تقتلني، فأموت بذنب الوردة كالعادة

وفي عزايا هوصي إن القهوة تبقي زيادة، وكفايا المرّ اللي أنا
عيشته

وأنا كمان مرضي بدمعتين ينزلوا عليا وصورة تتعلق على الحيط
عشان تخلد ذكرى ليا

قصيدة (سوق الجمعة)

في أول جمعة من يناير، نزلت السوق وأنا ببيع

ونفس الجمعة من سنة فاتت، كنت نازل شاربي

وقفت وخذت مكان وبدأت الناس تتلم حواليا

وشايف عليهم علامات تعجب، وبيسألوا أنا هبيع إيه ومفيش
حاجة جمبيا

وتطوع واحد وبيسأل إنت واقف ليه وواحد جمب وعامل

فيها بيع ليه

وميعرفش إني مش بضحك عليهم وإني بيع وجيت السوق
أبيع في خداع

اه خداع، ومالك باصص ومستغرب، كام واحد ساب إيدك في
نص السكة وإنت لسه بتقرب

شكلك لسه متعلمتش، رغم كل الوجة ده ولسه محرمتش

بس أنا حرمت وحي أبيع، هبيع قلبي برخص تراب

وياريت متسألنيش عن الأسباب

بس أنا عايز اتكلم، واعتبره ده من ضمن البيعة

قلب وعليه كلام شايله جوايا هدية و ده عرض مش هيتكرر،
إلحق العرض يمكن مفيش مرة جاية

أنا نصيبي فاتني من الدنيا، و ده مش ظلم لأ دي حاجة إلهيه

يمكن اللي حبتهم وبعدوا عني، كان وجودهم شر ليا

بس الحاجة اللي متأكد منها إن، الهنا ميعرفلش سكة والتعب
بيتي ومطرحي

وأنا لو في جيبي ٥ قروش ببقي مع الناس سخي

حاولت مبررش إن دي طيبه زيادة مني

اكتشفت إنها غباوة ملهاش آخر

وملقتش المعاملة بالمثل، مع إني أمثل من يستحق

وخذت العتاب سكة، ومفرقش مع حد زعلي، وكأني طلعت
سكة ومليش أي أهمية

ومشيت وأنا عارف إن غياي مش هيفرق ١٠٠٪
وجي بتسألني هبيع إيه

، أنا جي أبيع قلبي برخص تراب، يمكن انسي يا حزين

ويمكن كمان أبيع ببلاش، منا خلاص فاض بيا

قصيدة (وحيد)

عادي أما أكون وحدي
ومليش خلاف مع حد
وأحب نفسي زيادة
ملقتش غيرها معايا وقت الجد

عادي إني أمسح ذكرى
وأقص حته من شريط حياتي وأكمل
بس لو العقل وافق
مظنش إن القلب هيتحمل

أيام بتمر، ومش شايف إن فيه تغير هيحصلي
ثابت في مكاني صنم، ولو كان فيه
كنت حسيت، او كان جه حد وقالي

كفايا، ومش هكذب على نفسي
ومش هفضل أذفع ضريبة كدي

أنا لوحدي

ومش مبسوط

وياريت اللمة تجمعنا

لقيت في وجودكوا معاني

واهي راحت

وبقيت معاشر الوحدة

ولقيت فيها حاجات بلا معني

ياريت تزوروني لو مرة
مش طالب زيارة ثقيله

لو بس خمس دقائق أشبع منكوا
هم الدنيا خدكوا وبقيت بعيد عنكوا
صحيح قلت المناسبات
أكيد ده مش تقصير منكوا

وهفضل أخلق الأعذار وهنسى
وكل يوم الساعة ١٢ pm
هفتكرك أندم

واقول خفيت ومش هتعب
ولا هداري
وهبقى صريح مع نفسي قبل الناس

وههرب من شيطان وسواس

وهروح مقام واتنين

وهخلي شيخنا يرقيني

وهلجأ لرب الكون

ومفيش غيره يقويني

ويبعد عني ناس بتخون

ويسترنني ما يأذيني

وهدور على سكة جديدة

ومش هغلط غلطي تاني

واقابل رفيق سكتي

ومش هرجع لأحزاني

وكلمة وحيد ماتت
وخذت عزاها من فترة
ودلوقتي بداية جديدة
ونقطة هشدلها ميت شطرة

دلوقتي بضحك وسعيد
وملازمني شعور
حقيقي كان مهاجرني من فترة.

قصيدة (منتصف الليل)

الساعة ١٢ منتصف الليل..

عقلي نايم وقلبي صاحي، وده نفس حال كل المجروحين

متحاوط بأربع حيطان، كنت بخاف وبتخفق منهم ومن
قعدتهم وأنا صغير

هما هما نفس الأربع حيطان، دلوقتي الي بلاقي معاهم راحت
البال

قد إيه أنا حالي اتغير!

بقيت أبعد عن الدوشة، بقيت بقول حاضر واتجنب أي
مناقشة، بقيت مسحول وسط نفوس البشر والمجتمع
وده مش من فراغ

دي نتيجة ضغوطات وكلام ولغبطة مشاعر ورغبة في حكاوي
كثير كان نفسي احكيها وكبرت وأنا لسه برضه مخبيها

كثير سمعت كلام ومُهاترات، بأني أسيب نفسي للدنيا وهي
هتراضيني

رجعت فلاش باك، وفضلت أراجع سنيي،
وكأني في ليلة الامتحان ومش سايب أي تفصيله

ولفت نظري في الفترات الأخيرة، إني مقصر في حق نفسي

والهالات السوداء ملازماني

وخذت قرار و من دلوقتي ، إن خلاص الوحدة مش مكاني

قررت إن المشهد الأخير مش مشهد النهاية

قررت أعمل جزء ثاني

أخذ بإيدي ، و أنسى الجزء الأولاني

في الإفتتاح هكتب في أول التتر، راحة بال

والبطولة المطلقة، لشخص؟

ومن تفاصيل شخصية البطل؟،

الصدق والحب والغيرة وعدم فعل مشاكل كثيرة

وأيوه بطلبها من دلوقتي، بقالي كتير ناقصني حب اهتمام
وسند وأمان

محتاج روح لروحي، محتاج أنسى الهموم اللي بفتح عيني عليها

محتاج إيد تاخذ بإيدي، وأنا أدوب واستسلم من لمسة أيديها

وبعلنها صراحة..

محتاج حبيب، يكمل معايا السكة كاملة وميجيش في يوم
يقول هسيب

مش عايز يكون في حياتي أي جانب من الأعداء، من قد إيه
وأنا عايش بين جنه ونار؟

مش بطلب إني أمشي على الصراط المستقيم ومقعش
ولا بطلب حياة مثالية

أنا بطلب إني أسلم من شر الحبسة جوه القفص

، زي الأسد اللي بيحاول يواجه خبث الضباع
وبرضه مسلمش

مش عايز أقول فرکش وأنا مش راضي عن فيلمي

هدي لكل مشهد حقه وهسيب في كل لوكيشن ذكرى

، وهعمل بوستر بالألوان مش سادة غامق

ودلوقتي أقدر أقول فرکش

ياريت تكون وصلتك الفكرة.

قصيدة (لما كنا صغيرين)

لما كنا صغيرين، كانت الدنيا لسه بخير، والحرام معروف
رسالته وفي غني عنه بالخير

لما كنا صغيرين، كانت الضحكة طالعه مش شايله أي دين،
والمحبة بين الناس ومفيش وجود للحاقدين

والشوارع هاديه، فاضيه والشمس بنورها صافيه

والكلام كان كله حكمة والنصايح رايحة جاية

و النوايا شائلة خير،

كان كل همي إني أعيش وأحلم ببكرة وهبقي فين

مكنش همي فلوس كتير، ولا بالدولار ولا بالجنية

كنت عايز أبقى مبسوط من جوايا

كنت عايز بيت بسقف خشب زي أفلام الكرتون

، مفهوش ولا غل ولا ناس بتخون،

كنت عايز بنت أكتب عليها وتبقي كل حاجه ليا، ونبقي واحد

مش إثنين،

نكبر ونعجز سوا

، وأهي كل دي أحلام وراحت في الهوا
وضحكت علينا الدنيا، وسرقت أيام وسنين وناس غاليين

كنت عايز تفضل بينا المحبة

، كنت عايز الفرحة تفضل بس مشيت حبه حبه ،

فا هعيش مسالم وفحالي، مستني لحظة ما يقولوا البقاء لله.

قصيدة (كريمة)

كل البشر تفاصيلهم واحدة

الضحك والعياط ونسيان اللي فات

ومع كل التشابه ده، محبتش غير واحدة

وميزتها عنهم، وكأنها غيرهم ومفيش وجه تشابه بينها وبينهم

خليتها مشواري ورحلتي، وكانت صاحبتني

كانت هي الفرحة وكانت هي البداية

كان وجودها كافي، مكنش يهمني مين سابني و مين كمل معايا

كنت كسبان دايمًا والحظ ملازمي

كان وشها حلو، كان ربنا كارمني

كانت تطلب مهما تطلب ولو اطول كنت أفلها قلبي هدية

وكانت بتحاول ترضيني ومتعرفش إني مش عايز غيرها هي

كانت سند واقفه جبل، وأنا كنت ساند مطمئن

وكان عشنا حديد جامد، ما يقدر عليه بشر

وأخيرًا عرفت راحة البال

وكريمة كانت سبب

وكانت الدنيا ماشيه تمام، لحد ما حالنا جاله يوم واتقلب

ما هو أصل الحب عمره ما غلب

والجبل اللي كان ساندي، ساب واتسلب

وبقيت باصص للأيام بنظرة خوف بعد ما كنت مطمئن

بس ساعتها عرفت إن عمرنا ما هنرجع زي الأول

وفضلت من غير سند وضهري بقا مكشوف

وكريمة بتعاني وأنا قلبي إتملى مالخوف

عشنا اللي كان حديد جه الورم هذه

وراحت كريمة وخذت معاها كل اللي فات

وسابت قلبي مليون نار وسابتني لوجع الذكريات

قصيدة (صاير)

زي كل يوم..

نزلت سُغلي وراكن أي حُزن على رف الهموم

وبركب مواصلات زي عادتي، ولبس سماعات

بسمع بيها صوت يلهيني وينسيني ويخلي مزاجي عال

بس النهاردة قررت ملبسش السماعات، كنت عايز أسمع
صوت الدنيا حواليا

كنت عايز أسمع زحمة الأتوبيسات وخناق بالكلاكسات
وناس العرق نازل على وشوشهم، محدش حاسس بيهم غير
مقسم الأرزاق

ولو بصيت في وش واحد منهم، تسمع في ودنك مَثَل، (اللي
يشوف بلاوي الناس، تهون عليه بلوته)

شوف كام واحد احتاج لناس و سابتة، و شوف كام واحد
محتاج لإيد تسنده!

وبصيت لبعيد وشوفت راجل، قاعد لوحده سعيد
ومزاجه عال و بيسمع الست (أم كلثوم)، و كام موال، و فطاره
قرصه و شاي

طب جايب طول البال منين وسط زحمة البشر وصراع النفوس

ولو سألته إنت كده وازاي، يقولك دي نعمة ورضا من عند
الرحمن

لسه البساطة عايشه وسطنا، ايوة لسه عايشه في كام واحد
مننا

لسه خير الله على الارض في عبده منتهاش ، و هيفضل الصبر
و الرضا ، مفتاح لكل الأزمات .

« واصبر وما صبرك إلا بالله »

قصيدة (ثمر)

شمس بنت بسيطة، ضحكتها صافية وجميلة، وفي يوم ليله
كل حاجة اتبدلت

كل شيء مبقاش حقيقي، وكل حاجة مزيفة، راحت فين
الضحكة، يا شمس، ده الحزن خدها واختفى

فين اللي كانوا قريبين من القلب، ده القلب انشق و ملوش
شفي

والنسيان مبقاش يفيد، ده الذكريات مخلده، والذكرى الحلوة
سنتي، قدامها مترين أحزان

والعمر، لو قماشه بيضه، هتلاقي الهم سبلها بُقع

والحب لو في وردة وكلمتين، مكنش الشاطر منا يقع

راحت فين يا شمس، الناس الطيبة، مشيوا ليه وسابونا وسط
النفوس المتعبة

راحت فين لمة زمان وليه البُعد هَدّ المكان، والسؤال بقا
بالمناسبة والأهل بقوا أبعد من الجيران

فين يا شمس أحلامك، وليه السعي بقا مرفوض والفرص قلت
والحُر بقا مسجون

فين شمس، و فين ضحكة زمان، ده كلكوا شمس، ودي قصيدة
للنسيان

قصيدة (حديث مع الذات)

يا أنا، انت فين وليه سايبني هنا، ليه مش عايز تاخذ بايدي و
سايبني لنفسى المترددة

يا أنا، خد بايدي لبر الأمان، تايه بقالي فترة، وانت سايبني ليه
و علشان

كل لحظة فخر واعتزاز بنجاح ليا، كنت بحس إنك مش راضي،
كنت بحس انها مش هي

وكل حاجة بتحصل في لحظة!

في لحظة ممكن تبدأ حياة جديدة، حياة من نوعها فريدة

وفي لحظة ممكن كل حاجه تتغير والأيه تتعكس

والقلب مش بإيدنا يحب مين ومن مين يحترس

بس دايمما الخوف بيطاردني ومش عارف أهرب منه، والوحدة
سره!

وكل شيء في حياتي متعطل، وكل حاجة بحاول أعملها مش
بقدر

سألت نفسي في لحظة صفي، هو إيه السبب؟

الوحدة فعلا!، ولا أحلام بتدبل، ولا أشخاص بتفارق
وكانوا فاكرين وجودهم مش فارق

ولا حنين للمة صحاب وضحك كثير، وخرافات عن التأخير،
وخرجات وصور

ولا إيه السبب، يمكن محتاج حبيب؟، يكمل السكة كاملة
ميجيش في يوم يقول هسيب!

يمكن، ظروف وبتعدي وهبقي كويس، يمكن محتاج أتغير!

طيب يمكن محتاج أكون بسيط!

بسيط ومشيلش من حد والضحكة متجيش يوم تفارق وشي
وأدور على اللي حبوني بجد، وأحافظ عليهم وأحاطوهم

ومخليش الخوف يبقي بيني وبين الحياة سد

محتاج أعيش وأسامح وأبقي أنا، وهتلف الأيام وهبقي فالج،
مش هفضل مكاني هنا..

قصيدة (ضهر وأمان)

لو هكتب عن أمي..
هقول..

اللي تعبت وسهرت ليالي
وكان كل اللي شاغل بالها حالي

وتظمن عليا بعامل إيه
واحكي لي مالك
وتسمع لو هقول فدان كلام

في وجود أمي مفيش تعب ولا ألام
في وجودها ريحة البيت كلها طيبة
نفس طيبة أمي وخوفها عليا

وفي غيابها، كل حاجة حواليا غريبة
هو هو نفس البيت
وهي هي نفس الحيطان
بس الحيطان ممكن تدارى من عيون الناس

لكن مين يقدر يداويك
وياخد من نفسه ومن راحته ويديك

وقريب تفرحي بيا
واجبلك حته مني هدية
يبقى تربيتك ونسخة مني

أنا سعادتي مربوطة ب أمي
ولو زعلتك في يوم مني، أنا أسف
ولو هطلع أنا الغلطان، فأنا عارف

وادفع أسفي أسفين
وانول رضاكي يا أمي
ومعاكي العيد عيدين
وانتي بخير وصحة يا أمي

قصيدة (صاحب سند)

يا صاحبي

هتاخذنا الدنيا وهتجبنا

ومن غدر الأيام اتفرقنا

والوحدة صعبة وأنا

في البعد ببكي على فراقنا

كنا واحد مش اتنين

واللقمة نقسمها سوا

وفي عز تعبي

وجودك جمبي الدوا

وبتسكن فرحتي في ضحكتك وإنك سعيد
وبفرح أكثر لما الهم يسبنا ويروح بعيد
و مين ينسي خروجتنا ولمتنا
خلاص بقت ذكريات بتوجع من قساوتها

خلاص هتمشي من زحمة حياتي
مش كنا اتعاهدنا إن الفراق
يوم جنازتي ويوم مماتي

عارف إنك مش مرتاح
والزعل واخذ من قلبك مكان
عارف إن ناقصك ظهر وسند وأمان

هنزعل وهنزعل وهتاخذ منا الأيام

وفي النهاية كتف في كتف
ومفيش للزعل بينا مكان.

قصيدة (غريب)

أتغيرت، وبقيت قاسي
وبقيت ناسي كل اللي حبوني
وبخدهم بذنب اللي نسيوني
ومسحوا كل ذكرى معاهم بأستيكة

وقدروا بسهولة ينسوا
والدنيا فل وفبريكا
وأنا اللي عايش متغمي
ومش شايل حاجة غير همي
ومش شايف أي جزء ان شاء الله حلو

يهون عليا غير أعي

مش بعرف أنسى اللي وجعوني
ولا اللي وجعتهم وبقلي خايف
من ذنبهم، بس اكتشفت
إني محتاج أسامح أكثر ما يتغفرلي

بسبب طبييتي وحيي ليهم
ذنوبهم كترت وأنا اللي بخلق الأعذار وبنسى
إن كل حب اتحول لقسوة
وكل يوم الساعة ١٢ افتكرك أندم

وافتكرك إن العاطفة جزء كبير
من تدمير وخراب حياة بني ادم
كل همه في الدنيا إنه يحب ويخلص

بس اكتشف إن الطرف الثاني محتاج
يتغش ويتخان وإن ألزم اهانه يتهان

محدث شبه الثاني و متصدقش
اللي يقولك كلنا بني ادمين زي بعض
لكل واحد فينا ملة وشكل ولون
وحرية ما يشاء في الكون

هو حرا!

لكن اللعب بالمشاعر مضر
زي السجاير، بتشرب وانت عارف سمها
وناسي أضرارها ومش فاكر غير شكلها

زي اللي سابتك في نص الطريق
وبكل برود قالت أنا مش هكمل

مش قادره أكمل حبك اللي يتعب

مكنتش تعرف إن كان فاضل

خطوتين ترتاح

ومشيت سابت الهموم أكوام

الحياة مش عاطفة

وده جزء صغير

وظلمت كل أجزاء حياتك

ومن حقهم عليك تتغير

من حقهم عليك تنسي وتسامح

حتى لو مجروح

النهاردة مش زي بكرة

ومسير الهم يروح.



شارك سطورك مع العالم

01122380443